



T 2816
3203 V.12

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
AUG 22 1939



欽定平定臺灣紀畧卷十九

哈佛大學漢和
圖書館珍藏印

五月二十七日

癸巳

柴大紀奏言四月二十一日

探得南路賊匪千餘潛聚於離縣十餘里之柴

頭港草蔴莊兩處欲截鹽水港往來之路使文

報不通軍需難運

臣

查兩處地方相近隨卽帶

領署遊擊邱能成守備楊鵬武舉陳宗器併義

民等馳赴柴頭港飭遊擊林光玉守備黃象新

武舉黃莫邦併義民等馳赴草蔴莊兩處一齊圍拏砲打死賊匪各數十人賊俱向西北奔逃追至水牛厝地方鳥鎗打死賊匪數十人趕過八掌溪尾賊衆四散遠竄該處竹圍錯雜又多溪坑恐有埋伏收軍惟兵丁陳連熟番海山一名陣亡義民黃奇許杏蔡平三名受傷奪獲賊旗砲子等項生獲賊匪李興一名審明正法又

探得林爽文糾衆復讐聚於離縣十餘里之打猫東勢湖等處妄圖截路以禁薪炭入城臣於

二十三日黎明親統官兵往拏正起行間賊匪數千分路來犯東北營盤隨排列隊伍對敵又據遊擊李隆報稱南路賊匪千餘來攻南門營盤卽飛飭守備黃象新將所帶兵丁併武舉黃莫邦監生李百川武生鍾習信等各義民隨遊

擊李隆協力勦擊

臣

督率遊擊楊起麟林光玉

邱能成守備楊彪陳明德署諸羅縣陳良翼武

舉陳宗器貢生張明義生員吳正蘭監生徐宜

玉等各義民在東北一帶截殺連放大砲賊亦

對放鎗砲自卯至午賊被大砲打死約有百餘

名尙抵拒不退

臣

見東邊賊勢散漫鎗砲亦少

卽飭遊擊林光玉守備楊彪等衝去勦殺其正

北一帶賊匪稠密鎗砲且多料林爽文或在其

中隨飛馬直衝遊擊楊起麟邱能成等併各義

民一齊跟隨奮勇向前殺賊十餘名賊見官兵

勇猛皆拚命飛奔追趕過牛欄山後值大雨收

軍其南邊遊擊李隆守備黃象新等當賊匪來

攻卽率領弁兵義民放砲打死賊匪十數人殺

死騎馬賊一人追過八掌溪賊又被鎗砲打死

十數人賊隨遠遁東邊遊擊林光玉等俱能奮
力追殺皆因雨收軍兵丁余振乾等二十八名
及義民李魏何潘二名被傷斬獲賊首三十二
顆奪獲鳥鎗砲子長短刀等項生擒賊匪陳光
喜黃阿進顏鳳等三名審明正法又於二十七
日探得南路賊匪復聚於離城十餘里之竹林
脚龍山脚楓樹脚一帶地方該處惟竹林脚最

為險要易於藏奸親統本標官兵義民等進剿
由中路火燒莊前往竹林脚派令遊擊李隆參
將潘韜等帶領弁兵併武舉黃奠邦各義民等
從赤蘭埔至龍山脚派令遊擊楊起麟林光玉
等帶領弁兵併武舉陳宗器各義民等由錄蔭
散至楓樹脚三路官兵一齊進剿賊衆抵死分
頭抗拒被官兵鎗砲打死賊匪各數十人賊隨

敗走由中埔山脚四散逃竄因山箐叢雜又值大雨收軍兵丁惟陳志朝等三名義民胡阿里等五名受傷生獲賊匪李祥魏滿郭天來陳牛曾老共五名審明正法併獲大旗一桿九龍袋火藥等項奏入

上命軍機大臣傳諭常青李侍堯藍元枚柴大紀曰賊首林爽文糾集黨羽蟻集於諸羅城外之柴頭

港竹林脚等處潛圖攔截復分路攻擾縣城看來竟係心恨柴大紀是以專力侵犯其鬼蜮伎倆甚奸狠可惡至藍元枚於本月初七日在蚶江配渡約計於十三四可抵鹿仔港着藍元枚將到鹿仔港後作何調度剿賊情形卽行迅速馳奏至李侍堯現駐廈門一帶離臺灣較近聲息相通且該處地方官自必時有稟報所有臺灣近日情形一得

欽定平定臺灣紀略 卷十九
稟報卽隨時奏聞

上又諭內閣曰柴大紀自駐守諸羅以來賊首糾合
匪徒屢次攻擾該總兵督率官兵義民奮勇擊殺
連得勝仗賊匪敗退實屬可嘉柴大紀着交部議
敘其隨從打仗出力之遊擊楊起麟林光玉邱能
成守備楊彪陳明德署諸羅縣陳良翼武舉陳宗
器黃奠邦貢監生張明義等着交常青查明具奏

候朕降旨議敘獎擢以示鼓勵

二十八日甲午李侍堯奏言閩省兵額本少所有

臺灣戍兵及調往征兵經去冬賊匪滋擾及本
年鳳山再失之後傷亡失散者多應及早募補
以實營伍第臺灣戍兵征兵本由內地各營派
往所有缺額應查明何營何兵之缺方可令原
營募補現在各營本有餘丁待缺挑補茲于二

月十九日卽飭臺灣鎮將查造又屢次檄催嗣據柴大紀與遊擊孫全謀造報前來均係約畧總數內地各營無由知某營缺少若干難以懸揣挑補十四日准將軍常青移送臺灣鎮中軍守備王天植所造清冊前來係就現在府城各營並班滿未回留用兵內所有傷亡病故散失無着各數一一開造俱有營分及戰守名目可

查共四百六十六名

臣思常青接奉

諭旨自應於義民內接補

臣

若又令內地各原營補

旨

額恐致一缺兩補因咨常青於去歲所調征兵

內如有缺額就近於軍營餘丁或臺地義民接

補其舊時輪班駐守之戍兵

臣

卽檄飭各標營

查照缺數速將餘丁內挑補如有不敷再行召

募補足其諸羅鹿仔港北淡水南淡水各營該

備因信息未通尙難查造應令於大兵進剿道路相通時隨處查明造報卽照此分別辦理再提臣藍元枚帶兵前往鹿仔港其水師提督印務奉

旨令漳州鎮總兵常泰暫行署理查水師提督駐劄廈門常泰應卽前往該處現有金門鎮總兵羅英笈在彼彈壓且地近泉州一切地方營伍事

件臣就近可以照料惟漳州一帶民情慄悍易

於生事並據藍元枚訪知會匪多係漳屬之平

和長泰等縣人是該處不可無大員彈壓理合

奏明令常泰駐劄漳州兼辦水師提督事務轉

屬有益再將軍恒瑞於初八日在廈門開洋浙

兵由蚶江配渡者副將琢靈阿帶兵一千於初

三日開洋提臣藍元枚續帶兵一千於初八日

開洋其最後之一千總兵魏大斌帶領亦已在
廈門登舟茲探得恒瑞將至澎湖洋面被風折
回於十一日仍收泊料羅其前行各兵船有收
入澎湖者藍元枚琢靈阿等船欲沿海戲駛至
金門趁南風斜渡鹿仔港十一日亦因東風甚
大寄泊沙滬俱俟風色稍順再行開洋至漳浦
械鬪一案據報現多畏罪逃匿該鎮道等正在

設法緝拏

臣

料理過兵今已竣事卽於十六日

起程前往察看情形指示辦理其浮山社許姓

藉屍強搶一案已拏獲四十四名提解審訊適

撫

臣

徐嗣曾巡查口岸亦到泉州就近督同藩

司各道審辦

臣

到漳浦查辦械鬪之案回至泉

州計此案亦可審有就緒

臣

與徐嗣曾再行會

同嚴訊從重定擬具奏再巴圖魯侍衛章京烏

金定之文臺灣通志卷之九
什哈達等八員於本月十一十二等日先後到
泉州十四五日可到廈門登舟所需鑼鍋帳房
戰箭等項臣先飭中軍希當阿預爲備辦交該
員等帶用又因臺灣營中本無馬匹亦於就近
營分挑選臙壯馬每員各給三匹以備到彼打
仗之用再前撥銀二十萬兩分路解往府城鹿
仔港兩處以作僱價賑需其泉廈兩倉現貯之

米暫留作兵糧等用今蒙增撥江西米石則閩
省軍糈民食均已寬裕所有臺地鄉勇難民等
項自須銀米兼放更覺有益除已撥銀八萬兩
分解外又先撥米五萬石銀八萬兩各半分解
臺灣府城及鹿仔港兩處其鹿仔港內難民一
項臣前所買薯乾已解往十萬斤今又買得五
萬斤解往搭配米糧均勻散給計府城鹿仔港

兩處所有鄉勇既可銀米兼支而難民并有銀米薯乾三項勻配支放亦俱不致失所再各省備貯火藥定例於額貯三年數內支出一年操演仍照動支之數逐年委員採買補足本年閩省因預買乾隆五十三年額硝現因臺灣勦匪須用火藥甚多若照例於冬季委員按額採買不免稽遲且不敷所用自應及早多爲採買擬

卽行委員於歲需軍硝一十六萬八百九十斤十四兩零並帶買從前缺硝一萬一千斤外添辦二十萬斤內於山東省添買十萬斤湖北湖南兩省各買五萬斤並乘委員赴湖南購硝之便帶辦硫磺二萬二千五百斤一面行文各該省督撫一俟該員到日作速催令購辦齊全運回應用其動用價值水脚等項俟辦回時飭令

備旨省督撫一俟該員到日作速催令購辦齊全運

據實造報核銷再於本月十二日接奉

諭旨令江西碾米十萬石運往福建閩省得此接濟

一切軍糧平糶等項均屬充裕至此次米石應

於何處接收以及僱船裝載等事飭司道查議

據稱江西入閩之路有三其廣信府之鉛山縣

一路有陸運四五站寧都州之瑞金縣一路更

係山僻小路挽運維艱惟建昌府之新城縣由

五福地方陸運八十里至閩省邵武府光澤縣

之上水口即可用竹牌及小船剝運此係向來

解運銅鉛之大路由上水口再四十里至光澤

縣又可換大船運至省城再用海船裝運至泉

廈等因是江西省之米應在光澤縣之上水口

交兌查五福起岸係江省新城縣地方僱夫挑

運應由江省辦理自上水口僱船及竹牌剝運

應由閩省辦理仍各委大員在上水口公同交收所有腳價各歸本省報銷除一面札商江西撫臣確按該省情形如果此路較便卽由該處解運臣酌委道府前往接收轉送奏入

上命軍機大臣傳諭常青李侍堯曰現在臺灣調往征兵所有額缺常青自應先於義民鄉勇內擇其奮勇出力者拔補至臺灣暑時輪班駐守之戍兵

向例本由內地各營派往朕思此等戍兵由內地調遣旣不免往來繁費而該兵丁等一經調派戍守更不免繫念家室必多顧戀若專用臺灣本地民人充補額缺又恐日久該處情形內地不能熟悉亦非萬全無弊之道朕意嗣後此等換班兵丁一半用該處土著一半仍由內地各營抽調派往換班則內地旣可稍省調遣繁費又能熟悉臺灣

風土人情實爲一舉兩得且遊手無藉之徒得以歸伍食糧更可化無用爲有用着常青李侍堯於勦捕賊匪事竣後公同熟商遵照辦理又昨據林小文供稱天地會名目上年係林爽文倡起由臺灣而至內地等語林爽文設立天地會名目糾約多人肆行不法且現據藍元枚訪知會匪多係漳屬之平和長泰等縣人是林爽文不但窺伺臺灣

並欲勾結漳泉一帶蔓延滋擾顯有先得臺灣便可漸入內地之意甚爲奸險可惡但此時不可遽行查辦以致人情驚擾至將來勦賊事竣後常青李侍堯務將結會根由及附從入教者詳悉查明痛加懲創不可稍留餘孽再恒瑞藍元枚帶領滿兵浙兵於初八日開洋後被風折回朕心深爲焦急着李侍堯卽將恒瑞藍元枚究於何日得風端

金定之知臺灣總督 卷十九
渡之處迅速具奏其漳浦縣強搶械鬪兩案既已
獲犯多名提解審訊當以速行審辦完結爲要至
漳州鎮總兵常泰已令暫署水師提督現在漳州
正需大員彈壓自未便卽往廈門遠離該處朕於
披閱摺片之初卽行批示後見該督奏明令常泰
駐劄漳州兼辦水師提督與朕意脗合所見甚是
至本日柴大紀賁摺把總鄭士勝來至行在隨令

軍機大臣詢以該處情形應對尙爲明晰並據稱
曾隨柴大紀在諸羅與賊打仗數次看其人尙明
白奮勉着常青卽將鄭士勝拔補千總如將來該
弁回至臺灣再能出力卽擢授守備亦無不可

臣等謹案臺灣駐守兵丁向例由內地輪班而
往此番因正值剿匪之時未及遽行更替我

皇上以戍卒遠涉重洋不免繫戀家室專用本地民

人充補又恐該處情形內地無由熟悉因酌為
兩用之道不特稍省調遣之繁兼令遊手無藉
之徒皆得食糧歸伍地方更可陰受其益曲體
人情隨宜措置

聖照所周迥非淺慮所能計及也

上又諭內閣曰常青自抵臺灣卽慰撫義民鄉勇俾
伊等共知激勸用命爭先至賊匪攻犯府城預先

設法防堵並督率官兵鄉勇迎捕截殺屢次克捷

甚合機宜朕心深為嘉獎常青着交部從優議敘

至李侍堯駐劄廈門一帶照料官兵配渡迅速辦

理軍需糧餉均能先事預籌源源接濟孫士毅挑

備粵兵遄赴閩省所有火藥鉛彈等物均能寬裕

籌備解送應用皆屬急公可嘉李侍堯孫士毅着

交部議敘

二十九日
乙未

上命軍機大臣傳諭常青李侍堯曰將來勦捕事竣
柴大紀屢著勞績自應卽實授提督但該鎮任臺
灣總兵已經數年該處情形較爲熟悉且領兵勦
賊屢次克捷威望較著卽日賊匪蕩平所有善後
事宜皆須該鎮隨同常青悉心籌辦而臺灣經此
次賊匪滋擾官兵平定之後尤宜加意整頓若將

柴大紀授爲提督則須駐劄內地臺灣卽無熟手
經理之人朕意將來事竣後應令柴大紀以提督
管臺灣鎮總兵事務在彼彈壓料理二三年再調
回內地於綏靖地方更爲有益所有內地提督員
缺着常青李侍堯於梁朝桂陸廷柱二人中察其
才具並何人最爲打仗出力之處酌舉一人可以
署理提督者據實具奏至常泰現署提督留駐漳

州雖未經領兵打仗如量其才具堪勝提督之任
並着一併奏聞候朕酌量簡署至臺灣遠隔重洋
屢有械鬪搶奪之案今林爽文等竟敢立會糾眾
刦縣殺官自係歷任道府廢弛闕冗擾累地方以
致養癰歛怨激成事端不可不嚴加治罪以儆將
來着傳諭常青李侍堯於剿賊事竣卽將歷任道
府嚴切查明據實叅奏

三十日
丙午

上命軍機大臣傳諭常青李侍堯曰朕披閱藍鼎元
所著東征集係康熙年間臺灣逆匪朱一貴滋事
官兵攻剿時伊在其兄藍廷珍幕中所論臺灣形
勢及經理事宜其言大有可採如所稱諸羅一縣
地方遼濶鞭長莫及應劃虎溪尾以上另設一縣
分駐半線地方並於各要隘處所增添巡檢十把

總員弁以資防守等語後從其說添彰化一縣至該處迄今又越六十餘年土地日闢戶口日滋酌量情形有須添設文武員弁以資控制撫馭之處前經降旨令常青李侍堯於勦賊完竣辦理善後事宜時一併籌酌今閱藍鼎元彼時卽有此議是臺灣增設官弁實爲最要又覆閱總督滿保經畫疆里一書內稱臺灣地方地土廣饒糖穀之利甲天下過此再四五十年卽內山山後皆將爲良田

美產若劃定疆界將人民驅逐不許往來耕種勢難禁止等語所言亦屬有理臺灣疆土旣開民安耕鑿處處皆成膏腴之地自楊景素議立界限之後則界外良田美產轉畀生番而生番以射生爲業不事耕種勢必內地民人仍往偷墾日久徒滋事端是定立界限究恐不無流弊又與提督施世

金定三才圖會卷之九
驃書內稱賊衆至三十萬其中畏死脅從非盡出於本願或有掛名賊黨以保身家者若盡誅之多殺生靈亦屬無益似應止殲巨魁反側皆令自新等語現在林爽文糾合匪衆所到村莊以勢迫脅如有不從者卽行焚殺小民畏死偷生出於不得已勉強附從以致日積日多前後自出一轍朕於此事初起時卽經降旨諭令該督等惟將渠魁首

逆及實在黨惡不法者皆應殲戮無遺其被賊迫脅出於無奈聽從者准其悔罪自新以解散賊黨藍鼎元之語適與朕意相合常青於整齊兵力進剿時不妨先將此意出示曉諭使被脅良民及從賊夥黨得以畏罪投誠亦解散賊黨先聲奪人之一法此外書內所列各條尙多可採者藍鼎元籍隸漳浦所著東征集閩省通行必多着常青李侍

堯卽行購取詳閱於辦理善後時將該處情形細加察核如其書內所論各條有與現在事宜確中利弊窵要者不妨參酌採擇俾經理海疆事事悉歸盡善以爲一勞永逸之計

欽定平定臺灣紀畧卷十九

欽定平定臺灣紀畧卷二十

六月初三日

巳亥

常青奏言賊匪來去無常自四

月二十五二十九等日經官兵殺散之後又於

五月初三日糾衆來攻城外各營盤經

臣

派撥

將弁帶兵截殺鎗礮打死賊三百餘人奪獲鎗

刀器械二十餘件弁兵傷亡者查明賞卹初十

日差探距府二十里內外之鯽魚潭南潭中洲

虎尾寮等處俱各有賊二三千分踞要路並據前已投誠之莊錫舍差人密稟臺灣道府賊首莊大田帶領番婦文軍師人等亦同在眾賊屯聚南潭之內可以協力擒拿臣即於十一日黎明親自統率將弁帶領粵省兵二千名飛速前往剿捕賊眾未及準備俱各驚竄官兵向前冲擊鎗礮打死賊匪并殺死共五六百人奪獲賊

械三十餘件其時莊錫舍亦帶同義民與官軍

內外應合當即生擒番婦金娘賊犯林紅二名

其番婦現有顯神助戰旗號且以符咒蠱惑匪

類以及隨同打仗之林紅因姦勾結俱應與已

獲訊實之賊日王坑郎楊章二犯一並解京臣

約計叅贊恒瑞藍元枚及駐防滿兵早已登舟

自因守候風信尚俱未到臣惟有先將近府賊

巢逐一殲除侯恒瑞等一到卽親統大兵自南而北沿途一有擒獲卽隨時奏報再理番同知黃嘉訓將砍殺王芬之義民陳秀成及在場証見人等同王芬首級解送前來臣等詳訊陳秀成供認明確且有擒獲王芬之鄭岱及在場之蔡運世等願具並無假冒甘結反覆究詰似無疑義至前許投誠之莊錫舍自三月二十七日

隨同官兵隊伍殺賊後卽前往鳳山之鹽水埔莊意欲截賊歸路卽將莊大田擒獻因人少不能見功又設計令人在賊中偵探信息至五月初三日莊大田來攻府敗退仍將賊衆分路南潭中洲等處莊錫舍探知一面差人密稟道府一面密約義民等伏於賊隊之後十一日官軍進攻南潭賊匪大敗深以未獲莊大田爲恨臣

看其雖係投誠之人將來或尚有可用之處是以姑令暫留軍前聽候差遣再王坑郎楊章番婦金娘并林紅等犯臣提齊研訊緣番婦金娘平日以符咒治病騙人錢財適值南路賊匪莊大田等攻擾鳳山即欲假其邪說蠱惑匪眾因以番婦為軍師稱做仙姑而番婦亦遂每次打仗執劍念咒作此鬼蜮伎倆欺弄鄉愚并受林

爽文一品夫人偽札林紅前認番婦為姊後與

通姦并學其畫符治病是以打仗時跟隨番婦

轎邊稱護至王坑郎係王坑郎向充鳳山縣糧

差後改皂役又名王璉莊大田要他向各殷戶

派銀許做副元帥又領有賊旗管辦運糧楊章

一犯係賊黨許尚招入天地會給與小旗令其

管隊許事成封為元帥該犯因此屢與官兵打

仗逐加究詰各供認不諱現將該犯等押赴泉
州交督^臣李侍堯另委委員解京各犯家屬財
產分飭各該地方官照例查辦並將搜出番婦
經本僞札另封呈

覽奏入

上命軍機大臣傳諭常青李侍堯藍元枚曰莊錫舍
自投誠後屢次隨同官兵打仗殺賊茲聞莊大田

帶領番婦等屯聚南潭卽密行稟報並自帶義民
與官軍內外應合當將番婦及賊犯林紅擒獻甚
屬出力可嘉莊錫舍著卽賞給守備並著常青面
加曉諭獎勵俾莊錫舍益知感奮力圖自效閱賊
首林爽文所給番婦札內有到府城相會之語是
其意實欲窺伺府城特因大里杙莊係其巢穴與
諸羅相近林爽文惟恐遠離該處爲柴大紀所乘

是以尙在諸羅一帶滋擾而莊大田屯聚南潭等處糾集夥黨分踞要路其意則專在窺伺府城此時若能先將莊大田擒獲則南路賊匪自可以次廓清現在常青於粵兵到齊後帶領出城勦捕卽連得勝仗已覺壁壘一新聲威壯盛恒瑞所帶駐防滿兵及藍元枚所帶浙兵一得順風自卽可過渡常青於恒瑞等到後卽可會同統領大兵前赴

南路逐一殲除乘勝疾趨一舉蕝事至大里杙爲賊首巢穴前據林小文供稱該處莊內以大毛竹爲牆垣牆外有溪水環遶等語已降旨令常青於進搗賊巢時用火攻爲上策所需砲位如不敷卽在該處鑄造亦無不可所需火藥並著常青咨會李侍堯如數迅速運往寬裕接濟再朕所閱藍鼎元所著平臺紀畧藍廷珍進攻鹿耳門收復郡

城不過七日而其餘黨竄逃各處乘間竊發輾轉
搜捕幾及二年始能辦理完結將來常青藍元枚
南北兩路進兵攻勦擒獲首逆林爽文莊大田等
自應解京盡法處治其被賊脅從隨同附和之村
莊百姓應先行曉諭令其速行改悔棄械歸農卽
貸其一死各爲安分良民以解散其黨羽至賊目
及天地會匪自知罪在不赦一見首逆被擒勢必
紛紛竄入內山希圖苟延殘喘及大兵撤後又復
勾結滋事將來辦理轉爲棘手常青等於攻勦時
務須嚴密圍堵如可設法招撫者不妨權宜招致
並曉諭生番如有竄入該境者卽時縛獻賞以花
紅布疋如此辦理俾賊匪餘孽無所逃竄庶可淨
絕根株若任其潛匿稽誅又如從前辦理朱一貴
稽延日久更屬不成事體著常青務須相機妥辦

欽定平定臺灣紀略卷二十一
以期一勞永逸

上又諭內閣曰臺灣林爽文等滋事不法將民莊燒劫隨即逼令附從以致農不歸耕商難復業屢經降旨諭令常青等惟將渠魁首逆及實在黨惡不法者皆應殲戮無遺其被賊迫脅出於無奈聽從者准其悔罪自新以解散賊黨常青不妨整齊兵力前往攻剿之先即將此意遍行出示曉諭使被

脅民人及從賊夥黨一經悔罪棄械投誠即可歸農各安耕種不但可免從逆死罪而且及時耕獲仍得口食自給贍養身家實屬一舉兩得且伊等亦知賊匪勢日窮蹙日暮必就殲擒起此時通行曉諭將脅從賊衆安撫歸農既可解散賊黨而現在節屆大暑臺灣本係產米之區每年三熟尙可趕種兩熟於軍糈民食均有裨益至臺灣地方經

此次賊匪滋擾所有百姓田廬產業被其蹂躪劫掠及遷徙失業者諒必不少現在恢復各處村莊及未被賊侵擾業經插蒔佈種者尙有若干處所並著常青查明迅速覆奏以慰厘念民依至意

臣等謹案林爽文謀逆到處焚劫村莊小民賢產已絕不能自存無奈偷生從賊而一經從賊自知罪在不赦遂取土於附和蟻聚口多我

皇上周知民隱深原其被害之由

與命屢申凡從賊夥黨一經棄械投誠即可免罪並得及時歸農安業養贍身家猶慮陷賊者無由盡知復

命遍行出示曉諭以開其悔罪自新之路厥後各莊投出者紛紛不絕足徵好生之德協於民心而格外矜全真無所不至矣

初五日辛丑李侍堯奏言將軍恒瑞提臣藍元枚

等所帶滿兵浙兵於十四日得有順風俱即揚帆飛渡其巴圖魯侍衛章京八員亦於十八日

開洋計日內俱可到臺地臣因漳浦縣械鬪

案藍元枚未及辦結隨於本月十六日起程前往查辦今已將起意糾眾械鬪及傷斃人命各正犯吳春等先行拿獲另有平和縣匪徒周思

等糾眾搶奪先經臣訪知飭拿茲平和營遊擊

岳新泰探知各匪聚於霞寨堡內即帶兵前往

圍拿各犯竟敢用鎗銃刀棍等項抗拒該遊擊

督率兵丁奮勇向前拿獲周思周寬等十名並

鎗斃周污一名查械鬪一案尙未敢恃強拒捕

其平和搶奪各犯既聚眾多人及官兵擒捕復

敢持械抗拒致兵丁等帶傷者七人尤爲目無

法紀臣擬在漳州將拒捕一案凶犯訊明即正

法數人以示懲警然後回至泉州其械鬪一案

尚有未獲各犯現飭速拿俟到日一併審辦奏

入報

聞

初六日壬寅

上命軍機大臣傳諭常青李侍堯曰臺灣地方三面

瀕海且斗六門鹿仔港及府城外南潭一帶處處

俱有賊匪竄聚將來大兵搜剿賊勢窮蹙內山要

隘既有官兵堵截必思乘間逸出海口四散竄逃

希圖苟延殘喘亦未可定此係最要不可不預為

之備現在兵丁配渡船隻已抵臺灣凡鹿仔港府

城登岸之處酌派弁兵分撥各船令其離岸稍遠

散布停泊留心查察不使匪犯得以偷渡免脫方

爲周安再昨據李侍堯奏前往漳州查辦械鬪搶奪兩案擬在彼審明正法數人再回至泉州等語此案兇犯已拿獲多名易於審辦設此內亦有天地會匪名目祇可俟將來擒獲林爽文後再行查辦此時尙非急務李侍堯毋庸在彼久駐漳州鎮常泰現署提督此等緝拿餘犯自尙能辦理李侍堯卽當仍回廈門駐劄且大兵四路搜勦保無餘匪竄回內地李侍堯卽應督率地方文武員弁隨時查察實力擒獲

初八日

甲辰

上命軍機大臣傳諭常青李侍堯藍元枚曰閱臺灣圖內斗六門有溪河數道俱係通海之路大埔林牛欄山一帶現在俱有賊匪竄聚斗六門前據奏久被賊匪佔據南北聲息不通經常青派令叅將

金瓶梅詞話卷二十一
潘鞞帶兵一千名前往諸羅協剿該叅將因陸路賊多不能前進仍回至府城山海道至諸羅是沿海一帶尙無賊匪卽日大兵進剿四路夾攻將斗六門大武隴等處竄跡賊匪廓清掃除設賊匪計窮勢蹙或偷覓小舟由斗六門之溪河逸出海口而洋面島嶼叢襍易於竄匿希圖苟延殘喘亦未可定不可不預行設法防備着常青等務揀派得

力將備帶領弁兵於通海各溪河處嚴密防守所有通內山各要隘亦務遵節次諭旨派兵堵截並將船隻收藏毋令近岸如此四面防堵水陸兩路俱無虞其乘間竄逸庶可搜剿無遺至恒瑞藍元杖侍衛章京等計此時早已到齊常青自己乘官兵銳氣方盛之時統領剿賊乘勝長驅其如何調度進剿及打仗殺賊情形務隨時加緊馳奏至藍

元枚前抵鹿仔港後與普吉保作何調度籌畫曾
否先將斗六門一帶賊匪剿除殲戮著藍元枚亦
卽將籌辦剿捕情形迅速奏聞

初十日

丙午

李侍堯奏言粵兵四千前已俱令由

廈門往常青處四月中旬全數到齊滿兵一千
恒瑞帶領亦由廈門往常青處浙兵三千前令
藍元枚帶二千往鹿仔港尙餘魏大斌所帶一

千臣以常青稱南路賊匪甚多是以令魏大斌

亦由廈門往常青處查十四日得有順風飛渡

目下已俱到府城及鹿仔港兩處至臺地近日

情形臣參閱各官稟報並訪問往來船戶等愈

稱賊匪所掠米穀漸次吃完現將搶掘番薯作

食所得鳳山城內火藥鉛彈亦已用盡林爽文

有蓄髮親丁千餘名經諸羅屢敗之後亦十去

五六鹿仔港之馬鳴山埔心莊等營盤經內地
運大砲安設之後賊匪不敢來窺伺等語是賊
勢漸已衰敗今新兵俱到合之舊有之兵勢力
益加壯盛常青等剋日進剿自必卽有捷音再
查黃仕簡任承恩起程時亦自知情罪重大實
無可追蒙

皇上念黃仕簡已經老病任承恩又係殉難任舉之
子且尙未有子息

特加恩待以不死是於法無可貸之中更予以

矜恤生全之路不惟伊二人銜感無地現在漳泉官

弁兵丁無不仰頌

聖主格外施仁非尋常意計所可推測共相傳說感

激俱深合併據實覆奏奏入

上命軍機大臣傳諭常青李侍堯曰賊匪所掠米糧

火藥等物漸次用盡其勢日益窮蹙亦不過如釜底游魂苟延殘喘至林爽文竟敢令黨羽蓄髮作爲親丁實屬悖逆不法必應盡數殲戮此等匪徒既經蓄髮轉易識認實屬自留証驗常青等領兵等攻剿時但見有蓄髮者概行殲擒轉可不致漏網也至李侍堯應遵照前降諭旨卽速回至廈門駐劄照料一切爲是

十四日

庚戌

何裕城奏言各縣碾就之米已陸續

從新城縣五福一路趕緊運送又檢查舊案自新城至五福溪河逆流仍須由旱路起運是以改由海運較爲便捷而省脚價現在札詢兩江督撫俟查明海船咨覆到日立即分撥起運奏

入

上命軍機大臣傳諭何裕城曰軍糈米石關係緊要

自應星速撥運以濟急需前因何裕城奏或由陸路運送或由海道運聞札商李侍堯辦理殊屬推諉已降旨飭諭令將碾出米石斟酌何路近便卽定於何路迅速運聞今何裕城旣查明舊案新城至五福一路溪河逆流仍須陸路起撥不便從前曾有改由海運較爲便捷之案自應一面飛咨李世傑閔鶚元令其預備海船一面卽將陸運未竣

之米先行運至海口彼時船隻自己到齊庶可迅速起運如果米石先到江省船隻不能早行預備朕自將李世傑閔鶚元治以遲悞之罪乃何裕城計不及此竟俟該督等查明海船咨覆到日始行分撥起運則咨商往返徒稽時日豈不貽悞要需何裕城不但意存推諉而於事之輕重緩急全無主見竟係不善於推諉且不解事矣著嚴行申飭

仍着將此項米石於何日運至海口裝載起運之處據實覆奏勿再延緩推諉干咎

十五日辛丑常青恒瑞同奏言臣常青於十一日

率兵往南潭等處搜剿後賊首莊大田等仍恃

眾鴟張於離城二三十里外之大穆隆中洲埤

頭崙仔頂等處聚集茲於五月十四日高廉鎮

總兵梁朝桂先到叅贊恒瑞温州鎮總兵魏大

斌俱於十九日到臺灣府城其滿兵一千名惟

協領額爾登布所帶五十六名未到浙江兵一

千名惟把總吳森所帶七十四名未到餘皆於

二十二日陸續到齊臣常青臣恒瑞查看現在

帶兵鎮將足敷遣用而福州駐防併粵省浙江

官兵皆勇往精壯官軍聲勢既盛宜即乘銳前

驅殄殲醜類臣等一面檄委副將丁朝雄叅將

宋鼎并派臺灣原存兵二千八百餘名防守府城八門週圍堆卡又於粵省兵四千名內酌留兵五百名浙省兵一千名內酌留兵四百名并原調兵二千餘名分撥城外三處營盤駐劄仍會同臺灣道府獎率義勇人等協力嚴密防禦一面飭令隨征將弁作速整齊隊伍軍火器械料理停當臣常言臣恒瑞即親統滿兵九百三

十九名粵省兵三千五百名浙省兵六百名水師各營兵八百餘名督率鎮將員弁等於五月二十四日祭纛起程先往鳳山南路一帶賊人分踞之處跟踪搜剿堵截圍拿隨飛飭柴大紀普吉保徐鼎士等現在叅贊藍元枚計日已可到鹿仔港即妥商奮勇會剿並嚴防賊人逃入內山要路則南北匪衆自不能首尾相顧臣等

迅掃南路之後即乘勝并攻北路大里杙賊人
 巢穴總期生擒首逆一舉蕺事又前次南路鳳
 山失事潰散兵二千名現退回七百餘名復有
 受傷帶病從沿海陸續回歸者百餘名其年力
 強壯技藝頗嫻者尚似可用臣初到臺灣挑選
 留存仍隨營打仗復奉聖旨於五月

恩旨姑暫貸其一死該兵丁等無不感激輸誠圖報

但其餘未回者尚多且潰散之時亦必有為首

之人容臣於事定後從重查辦以肅軍紀至遊

擊鄭嵩係黃仕簡檄令前赴鳳山即往東港追

勦賊匪後因郝壯猷調回縣城把守南門三月

初八日該遊擊聞知賊人已入東門即帶兵迎

擊被賊鎗傷左臂落馬其親隨兵丁陳日中目

覩該遊擊遇害乃臣於前摺內未經聲敘明晰

實屬疎忽再北路蔴豆莊距府城三十餘里本
係糧米相通要路近於四月間被賊侵擾臣當
派革職効力之難廕守備黃喬千總盧思聰等
帶兵三百名前往剿捕嗣據黃喬稟稱四月二
十六二十八等日在溪墘地方遇賊千餘打仗
殺賊二十餘人割獻賊人首級二顆賊遂敗退
至五月初八日賊復糾夥數千前來圍莊官兵

義民力戰施放鎗砲打死賊匪六七十人奪獲

賊械各項惟千總盧思聰中箭陣亡又陣亡兵

丁郭順生等四名受傷者三名義民陣亡者三

名受傷者八名並請添兵應援等語臣隨飛檄

總兵柴大紀酌撥官兵星赴協剿經柴大紀派

令遊擊李隆楊起麟等帶兵一千五十名於五

月十二日馳抵蔴豆莊見賊約有二三千人該

將等卽率弁兵奮勇圍裏賊被鎗砲打死并殺
死者百餘人又追至灣裏溪邊落水淹死者又
有四五十人生擒匪犯王標等八名奪獲鳥鎗
刀牌等械因溪水漲發收軍回鹽水港駐劄道
又聞哆囉咽一帶賊匪欲攻鹽水港該鎮卽飭
遊擊李隆等暫且留兵該處截拿查守備黃喬
於初八日殺敗賊人之後以所帶兵少恐賊人

恃衆又來圍莊卽於十一日移兵暫駐離莊數
里之外以備堵截是以十二日未得與遊擊李
隆會兵一處旋因賊已敗退卽帶兵於十三日
回郡奏入

上命軍機大臣傳諭常青恒瑞曰此時大兵雲集將
軍叅贊乘此銳氣壯盛統領進剿自必勢如破竹
但此次常青等摺係五月二十四日拜發距前次

發摺之期已隔十日所奏太遲且海洋風信靡常
計奏到時已閱十二日實不勝懸盼煩悶著該將
軍等嗣後務於發摺後七八日卽將勦賊情形具
奏一次得有勝仗及擒獲賊首並有名頭目更宜
隨時加緊馳奏至常青所奏鳳山失陷兵丁逃亡
未回者尙多交常青於事竣後嚴查辦理以肅軍
紀再賊匪侵擾北路藤豆莊有千總盧思聰及兵

丁義民陣亡受傷者均應查明咨部照例賞卹

上又命軍機大臣傳諭常青恒瑞藍元枚曰據常青
等奏統領官兵起程進剿一摺據稱先往鳳山南
路一帶賊人分踞之處堵截圍拿但摺內又稱賊
首莊大田等恃衆鴟張仍敢於離城二三十里之
外大穆降等處聚集等語賊匪敢於附近府城各
處聚集竄踞倘窺伺大兵已出乘虛滋擾雖常青

等派有副將丁朝雄等帶領官兵足資堵禦究不
免有後顧之虞常青先應將城外賊匪搜剿圍拿
將賊首莊大田設法擒獲肅清肘腋方可乘銳前
驅至藍元枚帶領浙省官兵由蚶江配船開洋自
已早到鹿仔港此時作何調度籌畫亦卽迅速奏

聞

十六日
壬子

上諭內閣曰前經降旨將藍元枚調補福建水師提
督其福建陸路提督員缺令常青李侍堯於柴大
紀普吉保常泰三人內察看孰爲出力並才具堪
勝提督者保舉一人候朕簡放今觀柴大紀自
守諸羅以來屢次將賊敗退實屬奮勉可嘉柴大
紀著卽補授福建陸路提督但柴大紀任臺灣總
兵已經數年於該處情形較爲熟悉將來剿賊完

竣所有善後事宜正須該提督隨同常青悉心籌辦柴大紀著以陸路提督兼管臺灣鎮總兵事務在彼彈壓照料俟軍務告竣候朕酌量可以調回內地再行降旨柴大紀未回任以前所有福建陸路提督事務著常泰暫行署理

上又命軍機大臣傳諭李侍堯常青曰向來閩省百姓捕魚為業者甚多或載赴江浙一帶海口販賣

本年臺灣逆匪滋事該處耕種已稀若漁船不能照常出洋小民更致失業該督即行查明如有因賊氛未靖不敢出口捕魚販賣應飭沿海口岸文武員弁明白曉諭仍令照常謀生毋令失業但宜細查臺灣逆匪逃亡混入內地者耳不可因噎廢食

臣等謹案閩省沿海居民多以捕魚為業茲因

臺匪肆逆巡察緊嚴諒必有不取出口照常販賣者我

皇上慮小民無以謀生

特諭令海口文武員弁明白曉示仍令出口捕魚等致失業海隅細民生計無一不在

宵旰籌畫之中故百姓咸感

生成不復有一夫失所也

上又命軍機大臣傳諭蘇松水師總兵魏輒曰現在臺灣正在勦捕逆匪之時恐有賊黨餘匪逃逸偷渡混入內地該處雖漁汛已過海洋寧謐該鎮仍應在各海口督飭兵弁嚴密巡查如有逸匪竄入卽行堵截擒拿毋得稍生懈忽致賊匪得以混入

潛匿

十七日

癸丑

上命軍機大臣傳諭常青李侍堯藍元枚普吉保曰
據常青等委員將黃仕簡任承恩解到行在令軍
機大臣訊問據黃仕簡供到臺灣後實因年老患
病精神昏瞶以致手足無措種種遷延貽悞任承
恩供因賊多兵少曾經咨報總督請添派官兵又
鹿仔港民居稠密米糧積聚甚多未敢輕離且伊
曾經親往虎仔坑八卦山同普吉保及將弁等督

兵打仗彼時林爽文正攻府城聞信繞回護其巢
穴並欲來攻鹿仔港是以在彼防守不能遽離因
摺內未將自行帶兵親往之處聲敘明晰現有普
吉保及將弁等皆可質詢等語所供情節如果屬
實將來定案時尙可依朕前降恩旨貸其一死但
黃仕簡於上年查辦會匪楊光勳械鬪一案伊雖
曾患病朕令伊子黃秉淳馳往看視並諭黃仕簡

如果病勢難痊應令總兵何俊幫伊查辦而黃仕
簡奏稱病已全愈仍令黃秉淳回任並稱無庸何
俊幫辦是黃仕簡病已漸愈今又以染患風疾忽
止忽發為辭恐係藉病推諉冀圖自卸重罪至任
承恩正當年富力強尤非若黃仕簡之年老患病
者可比伊又自請前赴臺灣剿賊乃既不能奮勇
自効坐失事機且伊既咨請督臣添兵何以不行

自奏况提鎮奏摺俱係以字識繕寫伊平日豈無繕
辦奏摺之人乃現今詰問尚復巧辭支飾則罪上
加罪朕亦不能因其父兄著有微勞伊現無子嗣
曲為寬貸仍即按律寘以重辟皆所應得著將所
錄供詞發交常青閱看查明黃仕簡何故並不帶
兵親往有無飾詞卸罪並著藍元枚普吉保向將
備格綳額林天浴陳邦光等詳細詢問並密加體

訪任承恩所供各節是否當日實在情形抑係虛捏狡展之處據實具奏到日再行按律定擬

十八日 甲寅

上命軍機大臣傳諭李世傑閔鶚元曰前因何裕城辦理撥運閩省米石意存推諉且既查明改由海運較為便捷乃欲俟咨覆到日始行起運已傳旨嚴行申飭但何裕城既經咨商李世傑等自己早

經接到其如何撥派海船於何日駛至海口預備

裝載之處自應一面咨覆江西一面將准咨辦理

緣由迅速具奏何以何裕城奏到後已閱數日尚

未據該督等奏報軍需米石關係緊要今何裕城

既推諉於前若李世傑又復遲延於後豈不貽悞

要需著李世傑閔鶚元將此項海船於何日預備

齊集派員押至海口及江西米石於何日運到裝

載開行之處及因何並不先行具奏緣由一并據

實覆奏

欽定平定臺灣紀畧卷二十一

